

VENDIM
Nr.647, datë 11.6.2009

**PËR MIRATIMIN E DISA SHITESAVE DHE NDRYSHIMEVE NË LEJEN PËR
NDËRTIMIN DHE SHFRYTËZIMIN E LINJËS TREGTARE, ME RRYMË TË
VAZHDUAR, TË INTERKONJEKSIONIT, VLORË (SHQIPËRI) - BRINDIZI JUG
(ITALI), E MIRATUAR ME VENDIMIN NR.28, DATË 9.1.2008 TË KËSHILLIT TË
MINISTRAVE**

Në mbështetje të nenit 100 të Kushtetutës dhe të ligjit nr.9072, datë 22.5.2003 “Për sektorin e energjisë elektrike”, të ndryshuar, me propozimin e Ministrit të Ekonomisë, Tregtisë dhe Energjetikës, Këshilli i Ministrave


VENDOSI:

1. Miratimin e disa shtesave dhe ndryshimeve në lejen nr.2, datë 10.12.2007, miratuar me vendimin nr.28, datë 9.1.2008 të Këshillit të Ministrave “Për miratimin e lejes për ndërtimin e linjës tregtare, me rrymë të vazhduar, të interkonjeksionit, Vlorë (Shqipëri) - Brindizi Jug (Itali)”, dhënë “Interconnector Albania”, sh.p.k.-së, filial i “Moncada Energy Group”, Itali, pa akses të palëve të treta mbi këtë linjë, sipas tekstit, që i bashkëlidhet këtij vendimi.

2. Ngarkohet Ministria e Ekonomisë, Tregtisë dhe Energjetikës për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha





REPUBLIKA E SHQIPERISË
MINISTRIA E EKONOMISË, TREGTISË DHE ENERGJETIKËS

Në mbështetje të ligjit nr. 9778, datë 12.7.2007 "Për disa ndryshime në ligjin nr. 9072, datë 22.5.2003 "Për sektorin e energjisë elektrike", të ndryshuar", dhe në zbatim të vendimit të Këshillit të Ministrave nr. 529, datë 15.8.2007 "Për miratimin e kriterëve dhe të procedurave të aplikimit e të miratimit të lejeve të ndërtimit të linjave tregtare të interkonjeksionit", i ndryshuar, në *Lejen nr. 2, dt. 10/12/2007 "Per ndertimin dhe shfrytezimin e linjes tregtare me rryme te vazhduar te interkoneksionit Vlore (Shqiperi) – Brindizi Jug (Itali)*, të dhëne Shoqërisë "Interconnector Albania" Sh.p.k., regjistruar në Qendrën Kombëtare të Regjistrimit (QKR), Tiranë, në datën 31.10.2007; regjistruar në Drejtorinë e Përgjithshme të Tatimeve, me numër NIPT-i, K72312009B, me seli: rruga "Nikolla Tupe", nr.5, kati I, Tiranë, filial i Moncada Energy Group ne Itali (shoqëri e se drejtës italiane, regjistruar ne regjistrin e shoqërive te Agrigento, me date 19.02.1996 me numër repertori 125864 dt. 16.03.1991 , si Moncada Costruzioni srl dhe me pas me date 23.01.2008 ndryshuar emërtimi në Moncada Energy Group s.r.l.), bëhen ndryshimet dhe shtesat e mëposhtme:

1. Paragrafi i dytë hiqet tërësisht.
2. Paragrafi i trete pika (iii) ndryshon si vijon: "tensioni nominal do të jetë: $U_d=400$ kV"
3. Paragrafi i katërt ndryshon si vijon: "Puna për ndërtimin e linjës duhet të fillojë brenda 2 (dy) muajve nga data e miratimit të të gjitha lejeve dhe autorizimeve publike të lëshuara nga autoritetet shqiptare për ndërtimin e linjës së interkonjeksionit por jo me vone se 15 muaj nga hyrja ne fuqi e këtij vendimi";
4. Paragrafi i gjashtë ndryshon si vijon: "Koha e realizimit të projektit për ndërtimin e kësaj linje, lidhja me sistemin elektro-energjetik shqiptar dhe vënia në punë janë ato te paraqitura ne kronoprogramin e punimeve bashkangjitur kësaj leje".
5. Paragrafi i shtate ndryshon si vijon: "fjala në fund të paragrafit "tyre" ndryshohet me "sa]"".

6. Paragrafi i tetë ndryshon si vijon "Në rastet kur linja tregtare në rryme të vazhduar punon e pandarë nga sistemi elektro-energjetik shqiptar, pozicionuar në veri të Nënstacionit 30/110/220 kV në Babicë, që i korrespondon rasteve kur nuk do të prodhohen energji parqet eolike të cilët do të ndërtohen në Qarkun Vlorë nga Shoqëria Enpower Albania shpk, atëherë 20% i kapacitetit të transmetimit të linjës për të gjithë periudhën e lejes prej 20 vjetësh i jepet për shfrytëzim pa pagesë OST Sh.a., e cila do ta përdorë këtë kapacitet në përputhje me marrëveshjen që do të lidhet ndërmjet qeverive të dy vendeve për mënyrën e funksionimit të kësaj linje interkoneksioni si dhe legjislacionit shqiptar në fuqi".
7. Paragrafi i nëntë ndryshon si vijon: "Në rastet kur linja tregtare në rrymë të vazhduar punon e ndarë nga sistemi elektro-energjetik shqiptar, pozicionuar në veri të Nënstacionit 30/110/220 kV në Babicë, që i korrespondon rastit të futjes në prodhim të parqeve eolike të përmendura në paragrafin me sipër, atëherë shoqëria Interconnector Albania Shpk do të transferojë OST Sh.a pjesën e fitimit neto të realizuar nga transitimi i energjisë elektrike në këtë linjë vetëm për pjesën që tejkalon fuqinë në përjashtim të aksesit të palëve të treta (fuqinë mbi 400 MW). Vlera e fuqisë që tejkalon 400MW e cila do të merret për referim sipas kësaj dispozite, do të llogaritet si mesatare e vlerave momentale të fuqisë, të regjistruara në intervale të përcaktuara sipas një protokolli të posaçëm që do të nënshkruhet ndërmjet OST Sh.a dhe "Interconnector Albania" shpk. Çmimi i tranzitimit të energjisë që do të merret për reference në rastin e parashikuar nga kjo dispozite do të jetë çmimi i tranzitimit i zbatuar nga Interconnector Albania i përcaktuar në përputhje me rregullat e tregut shqiptar të energjisë elektrike".
8. Paragrafi i njëmbëdhjetë ndryshon si vijon: "Interconnector Albania" Shpk, jo më vonë se 2 muaj nga data e nënshkrimit të marrëveshjes së posaçme ndërmjet ministrive kompetente për energjinë të dy shteteve (Shqipërisë dhe Italisë), duhet të nënshkruajë me OST Sh.a një kontratë, e cila përcakton mënyrën e ndërtimit, dhe pas ndërtimit, mënyrën e shfrytëzimit të linjës së interkonjeksionit, në harmoni me mënyrën e aksesit dhe përdorimit të linjës, të cilat do të përcaktohen në mënyrë të hollësishme në marrëveshjen ndër-qeveritare të sipërcituar".
9. Paragrafi i dymbëdhjetë ndryshon si vijon: "Për të gjithë kohëzgjatjen e lejes, edhe sikur të jetë një situatë e kapaciteteve të limituara, shoqëria "Interconnector Albania" Shpk., do t'i sigurojë pa pagesë OST Sh.a-së kuotën e kapaciteteve, për të cilën nuk i është dhënë përjashtimi nga aplikimi i së drejtës për akses të palëve të treta".
10. Paragrafi i trembëdhjetë ndryshohet si vijon. "Linja e interkonjeksionit dhe të gjithë aksesoret e lidhur me të që mundësojnë funksionimin e kësaj linje dhe kalimin e energjisë elektrike nga njëri vend tek tjetri, në fund të periudhës së lejes, i kalojnë në pronësi, për pjesën që shtrihet në territorin shqiptar dhe pjesën përkatëse të ujërave

ndërkombëtare, OST Sh.a. pa pagese bazuar mbi procedura të cilat do të përcaktohen në përputhje me marrëveshjen nder-qeveritare te cituar ne pikën 10 me sipër”.

11. Paragrafi i katërbëdhjetë ndryshon si vijon: “Infrastruktura e cila do të mundësoje lidhjen e linjës tregtare të interkonjeksionit me rrjetin ekzistues të transmetimit, qe i korrespondon “Bllokut të Zbarrave të Lidhjes së Linjës 220kV” ku lidhet kablli në mbërritje nga Stacioni i Konvertimit HVDC i Interconnector Albania ne Babicë, do te ndërtohet nga Interconnector Albania duke zgjeruar territorin e nenstacionit ekzistues te OST ne Babicë me hapësirën e nevojshme te daljes se re,dhe do ti kaloje menjëherë ne pronësi OST Sh.a pa pagese duke u bere pjese e rrjetit kombëtar të transmetimit.”.
12. Paragrafi i gjashtëmbëdhjetë ndryshon si vijon: “Çelësi (Bay) bashkues/ndarës i linjës se interkonjeksionit, me rrjetin kombëtar te transmetimit te administruar nga OST, ne pikën e lidhjes sipas paragrafit 14 me sipër do te qëndrojë në regjim normalisht të hapur. Për këtë qëllim Interconnector Albania shpk duhet të instaloje në Nënstacionin e saj të Konvertimit HVDC në Babicë një çelës bashkues/ndarës në zbarrat 220kV në rryme alternative të këtij të fundit, në pikënisjen e kabllit të lidhjes me Nënstacionin Elektrik të OST në Babicë, çelës i cili do të jetë në pozicion normalisht të hapur gjatë gjithë kohës që impianti eolik i ndërtuar nga Enpower Albania shpk do të jetë në regjim prodhimi energjie elektrike. Nëse Interconnector Albania shpk kërkon te tranzitoje energji duke shfrytëzuar rrjetin e administruar nga OST, kjo e fundit ka te drejte te kufizojë aksesin ne rrjetin shqiptar te Interconector Albania Shpk për sa kohe qe pika e lidhjes ne nënstacionin e Babices nuk garanton mundësi teknike te përshtatshme për transmetimin e energjisë ne te dy kahet ne mënyrë qe te mos cenohet siguria e rrjetit shqiptar te transmetimit.”.
13. Paragrafi shtatëmbëdhjetë ndryshon si vijon: “Brenda një periudhe prej 12 muaj nga fillimi i punimeve, shoqëria “Interconnector Albania” shpk. duhet të depozitojë pranë Ministrisë së Ekonomisë, Tregtisë dhe Energjetikës dokumentet përkatëse, që vërtetojnë mbështetjen dhe garancinë financiare për realizimin e këtij projekti.”.
14. Paragrafi tetëmbëdhjetë ndryshon si vijon:

“Leja revokohet në rastet kur:

1. Shoqëria “Interconnector Albania” shpk. nuk paraqet ne Ministrinë e Ekonomisë Tregtise dhe Energjetikes, përpara fillimit te punimeve, të gjithë dokumentacionin, autorizimet apo lejet e ndryshme, të lëshuara nga autoritetet e shtetit italian, që kërkohen për ndërtimin e kësaj linje;
2. Shoqëria “Interconnector Albania” shpk. nuk fillon punën në afatin e parashikuar në këtë leje. Fillimi i punës vërtetohet me dokumentacionin përkatës dhe procesverbalin e mbajtur me Ministrinë e Ekonomisë, Tregtisë dhe Energjetikës;

3. Shoqëria "Interconnector Albania" shpk. nuk përfundon në afatin e përcaktuar në këtë leje realizimin e plotë të projektit për ndërtimin e kësaj linje, lidhjen me sistemin elektro-energjetik shqiptar, sipas skemës së rënë dakord me OST Sh.a.-në dhe vënien në punë të tyre;

4. Shoqëria "Interconnector Albania" shpk. nuk depoziton pranë Ministrisë së Ekonomisë, Tregtisë dhe Energjetikës, brenda një periudhe 12 muaj nga fillimi i punimeve, dokumentet përkatëse, që vërtetojnë mbështetjen dhe garancinë financiare për realizimin e këtij projekti".

15. Paragrafi i nëntëmbëdhjetë ndryshon si vijon: "Për rastet kur shoqëria "Interconnector Albania" shpk. nuk përmbush detyrimet e përcaktuara me sipër në këtë Leje apo nuk përmbush detyrimet e parashikuara në shkronjat "d", "e" dhe "f" të pikës 2.3 të vendimit të Këshillit të Ministrave nr. 529, datë 15.8.2007 "Për miratimin e kriterëve dhe të procedurave të aplikimit e të miratimit të lejeve të ndërtimit të linjave tregtare të Interkonjeksionit", si dhe nuk merr masat e menjëhershme për sigurimin e sistemit elektrik kombëtar, ministria i jep 30 ditë kohë për t'i përmbushur detyrimet. Nëse shoqëria "Interconnector Albania" shpk. përsëri nuk i përmbush ato, atëherë leja e dhënë revokohet".

16. Në të gjithë lejen Nr. 2 referimi "Moncada Costruzioni" s.r.l zëvendësohet me: "Interconnector Albania" shpk filial i Moncada Energy Group në Shqipëri.

MINISTRI I EKONOMISË, TREGTISË
DHE ENERGJETIKËS
Genc Ruli